

## ՆԵՐՔԻՆ, ԽՕՅԳԱՆ

Սվարանից գէպի հարաւ, մի ֆարսախ հեռու, մի հովտում կանգնած է Ներքին Խօյգանը. սա թիւրքաբնակ և հայաբնակ բաւական մի մեծ գիւղ է—130 տնից բաղկացած, որի երկու մասը թուրքեր են: Առաջ գիւղն ունեցել է բաւականաչափ հայ ժողովուրդ. այժմ շատ քիչ է հայերի թիւը, ընդամենը 30 ընտանիք է 228 շնչով, որից 114-ը արական է և 114-ը իգական: Նրանք կազմում են հին-Ջուղայից 1606 թւին Շահ-Աբբասի ձեռքով գաղթողների մի մասը. պարսպում են երկրագործութեամբ և մասամբ էլ անասնապահութեամբ:

Այս գիւղն ևս հաստատուած է 311 տարի առաջ. հարուստ է սառնորակ աղբիւրներով, որոնք բղխում են նրա լանջերից. տները մի յարկանի են և կողք-կողքի կառուցւած, իսկ փողոցները կեղտոտ են և ծուռումուռ: Հողը մեծ մասամբ ջրովի է, պարարտացնում են երեք տարին մի անգամ աղբով և հերկում արօրով. բերքերից ցանում են ցորեն, գարի, հաճար, կտաւահատ, արևածաղիկ, եօնջա, շալգառ, ոսպ և սիսեռ: Իսկ հողը խանական է. պատկանում է Հայթ-Ղուլի, Ջաֆէր-Ղուլի, Փարճ և Ջէլալ խաններին: Վերջինս նստած է գիւղի գիմացը մի զաւայում (բերդ): Բնակիչները հողագուրկ են. նրանք վարում, ցանում և մշակում են խաների հողերը և իրենց ստացած արդիւնքի  $\frac{1}{3}$  մասը տալիս են նրանց, բացի այդ՝ տարեկան վճարում են խաներին գլխահարկ, անասունների հարկ. ահա նրանց չափը.

Մարդագլուխ (տղամարդկանց) 3 դռան\*

Չորս ոչխարին  $2\frac{1}{2}$  դ. էշին  $2\frac{1}{2}$  դ. կովին  $2\frac{1}{2}$  դ.

Բայց գիւղացիները միայն այս ծանր հարկերը չէ որ տալիս են. նրանք չորս խաներ ունեն, որոնցից իւրաքանչիւրն իր ցանկութեան համաձայն հարստահարում, կեղեքում է գիւղացիութեան և նրանց տնտեսապէս քայքայում և դնում ոչնչացման ճանապարհի վրայ: Այսպէս բացի վերոյիշեալ

\* Դիւանարկ վերցնում են 18-20 տարեկանից սկսած, իսկ զրանից փոքրերից գլխահարկ չեն վերցնում: